

BOSNA I HERCEGOVINA
PARLAMENTARNA SKUPŠTINA
PREDSTAVNIČKI DOM

Broj: 01-011-121/00.
Sarajevo, 06.06.2000.

Z A P I S N I K

sa 21. sjednice Predstavničkog doma Parlamentarne skupštine Bosne i Hercegovine,
održane 06. juna 2000.godine

Dvadesetprvoj sjednici Predstavničkog doma prisustvovala su 32 poslanika – iz Republike Srpske 14 i iz Federacije BiH 20 poslanika. Odsustvo su opravdali: Raifa Alagić, Ivo Mijačević, Suada Muminagić, Hamdija Kulović i Ibrhaim Spahić, dok poslanici Haris Silajdžić i Safet Oručević nisu najavili izostanak sa sjednice.

Sjednici Doma prisustvovali su Jadranko Prlić, Marko Ašanin, Nudžeim Rečica i Gojko Milinković – ispred Vijeća ministara, te Kasim Trnka i Željko Samardžija u ime Predsjedništva Bosne i Hercegovine. Takođe su sjednici prisustvovali predstavnici međunarodnih organizacija u Bosni i Hercegovini.

Sjednici je prisustvovao i g. Spasoje Tuševljak kojeg je Predsjedništvo BiH imenovalo za predsjedavajućeg Vijeća ministara Bosne i Hercegovine.

Prije prelaska na utvrđivanje dnevnog reda pred Domom svečanu zakletvu je dao g. Rijad Raščić, novi poslanik u Predstavničkom domu.

Poslije davanja svečane izajve predsjedavajući Pero Skopljak predložio je samo jednu tačku dnevnog reda:

Potvrđivanje imenovanja predsjedavajućeg Vijeća ministara Bosne i Hercegovine.

O prijedlogu dnevnog reda nije bilo diskusije, pa je isti usvojen.

Predsjedavajući je ukratko podsjetio poslanike na Odluku Predsjedništva BiH o imenovanju predsjedavajućeg, a potom je g. Tuševljaka pozvao da Domu podnese ekspozice.

Obrativši se poslanicima g. Spasoje Tuševljak je podsjetio na okolnosti u kojima se dešava njegovo imenovanje i na “evidentnu krizu u političkim odnosima”, te da je on sada u okolnostima koje nisu do kraja definisane. Naglasio je, pored ostalog, da su u prethodnom periodu obavljene konsultacije uglavnom sa svim političkim faktorima u Bosni i Hercegovini, kao i sa predstavnicima međunarodne zajednice i da te konsultacije do današnjeg dana nisu završene, jer on nije od bošnjačke strane dobio preporuke i prijedloge za sastav Vijeća ministara. Istakao je da ni jedan program ne može da se realizuje bez tima i bez dogovora i konsenzusa u tom timu, pa je zamolio poslanike za sugestije i prijedloge za daljnje aktivnosti.

U diskusiji povodom predložene tačke dnevnog reda i obraćanja g. Tuševljaka, učestvovali su: Halid Genjac, Mirko Banjac, Pero Skopljak, Branko Dokić, Ivo Lozančić, Edhem Bičakčić, Miodrag Deretić, Nikola Špirić, Ana Havel, Sejfidin Tokić, Rasim Kadić, Bogić Bogićević, Mirko Baković, Rijad Raščić, Adnan Jahić, Zlatko Lagumdžija i Vito Rakić.

Jedan broj poslanika su zahtijevali da g. Tuševljak Domu podnese ekspozice kako bi se na osnovu toga opredijelili da li će mu dati podršku ili ne, a na drugoj strani, jedan broj poslanika je isticao da sam predsjedavajući ne može podnijeti program rada Vijeća ministara već da isti treba da usaglasa sa timom koji će činiti Vijeće ministara.

U toku diskusija zatražene su dvije pauze radi konsultacija.

Poslije posljednje pauze Domu se ponovo obratio g. Tuševlja, ali ne ekspozicijom. Istakao je, pored ostalog, da se istinski nalazi u neobičnim okolnostima, ali da sve to što se dešava treba shvatiti kao odraz realnosti u kojima se nalazimo i da treba strpljivo i uporno raditi da se brojne razlike, nejasnoće i dileme, različiti politički, ekonomski i svaki drugi interesi relativiziraju strpljenjem i međusobnim uvažavanjem, tolerancijom i razumijevanjem. Naglasio je da je istinski očekivao da će biti više spremnosti da se za današnju sjednicu sačini prijedlog strukture Vijeća ministara onako kako predviđa Zakon o Vijeću ministara. Izrazio je žaljenje što se zbog složenosti okolnosti nije došlo do tog stepena.

Gospodin Tuševljak je rekao da je on po vokaciji legalista i tehnokrata. Naglasio je da je svjestan svega onoga što Dejtonski mirovni ugovor, Ustav Bosne i Hercegovine i Zakon o Vijeću ministara daju nama kao okvir za ponašanje, te da je on jedan od šest jednakih u Vijeću ministara. Zamolio je poslanike da od njega ne očekuju “da ima pretenziosnost koja ne priliči ozbiljnom čovjeku”. Rekao je da on jeste spreman da se potruži da uloži svu svoju energiju da sa svojim budućim kolegama iz Vijeća ministara napravi jedan program koji će poslanici opet da ocjenjuju.

Pozvao je poslanike da, na bazi onoga što znaju o njemu i na bazi onoga što je rekao na sjednici, donesu odluku.

Poslije ponovnog izlaganja g. Tuševljaka, predsjedavajući g. Pero Skopljak je pozvao poslanike da se izjasne o potvrđivanju imenovanja predsjedavajućeg Vijeća ministara. Izjašnjavaju je, na ranije izneseni prijedlog, obavljeno pojedinačno – prozivkom.

ZA potvrđivanje imenovanja glasali su: Edhem Bičakčić, Rijad Raščić, Tarik Čaršimamović, Adnan Jahić, Hilmo Neimarlija, Ana Havel, Ljubomir Zovko, Ivica Pašalić-Lhotak, Pero Skopljak, Anita Mikulić, Mirko Baković, Mirko Banjac, Mara Perkanović, Desanka Rađević, Nikola Špirić, Branko Dokić, Branislava Jovanović, Milenka Bošnjak i Miodrag Deretić.

PROTIV su glasali: Rasim Kadić, Mustafa Pamuk, Zlatko Lagumdžija, Ivo Divković, Sejfidin Tokić, Bogić Bogićević, Ivo Lozančić, Radenka Balta, Dragan Mirković, Vito Rakić i Smail Bećirbašić.

UZDRŽANI su bili Halid Genjac i Abdurahman Malkić.

Predsjedavajući je saopštio da je, od 32 prisutna poslanika za vrijeme glasanja, ZA potvrđivanje imenovanja predsjedavajućeg Vijeća ministara glasalo 19, PROTIV 11 poslanika, a 5 je bilo uzdržanih. Po entitetima, iz Federacije BiH ZA je glasalo 11, protiv 7, uzdržan jedan. Iz Republike Srpska ZA je glasalo 8, protiv 4, a jedan uzdržan.

Predsjedavajući je konstatovao da je potvrđena odluka o imenovanju g. Spasoja Tuševljaka za predsjedavajućeg Vijeća ministara Bosne i Hercegovine.

Čestitajući g. Tuševljaku na podršci predsjedavajući Pero Skopljak je zaključio 21. sjednicu.

Sastavni dio ovog zapisnika je magnetogram 21. sjednice Predstavničkog doma.

PREDSJEDAVAJUĆI
PREDSTAVNIČKOG DOMA
mr. Pero Skopljak